



Broj: A- 1115/21-II
Sarajevo, 10.12.2021. godine

Na osnovu člana 29. stav 2. Zakona o Kantonalnom tužilaštvu Kantona Sarajevo (Službene novine Kantona Sarajevo broj 20/02, 22/02 i 30/08), člana 2. stav 1., član 7. i član 84. stav 1. Zakona o zaštiti i postupanju s djecom i maloljetnicima FBiH ("Službene novine Federacije BiH", br. 7/2014 i 74/2020), člana 9., 40., 42. i 43. Pravilnika o unutrašnjoj organizaciji Kantonalnog tužilaštva Kantona Sarajevo broj A-20/16, te Izmjena i dopuna Pravilnika o unutrašnjoj organizaciji Kantonalnog tužilaštva Kantona Sarajevo broj A-35/19 i A-577/20-II, člana 3., 8. i 25. Pravilnika o održavanju web stranica pravosudnih institucija u okviru pravosudnog portala Visokog sudskog i tužilačkog vijeće BiH broj 09-50-3931-2/2010, Smjernica za objavljivanje tužilačkih i sudskih odluka na službenim web stranicama Visokog sudskog i tužilačkog vijeća BiH broj 07-50-3031-1/2014 od 25.09.2014. godine, Odluke o uspostavljanju web uredništva Kantonalnog tužilaštva Kantona Sarajevo broj A-1115/21 od 10.12.2021. godine, Glavna kantonalna tužiteljica **d o n o s i** :

P R A V I L N I K
O
R A D U
WEB UREDNIŠTVA
KANTONALNOG TUŽILAŠTVA
KANTONA SARAJEVO

Član 1.

Primjena Pravilnika

Ovim Pravilnikom uređuju se organizacija, način rada i poslovi koje izvršava web uredništvo Tužilaštva, kako bi se omogućilo pravovremeno informiranje javnosti o radu Tužilaštva. U svom radu web uredništvo je dužno pridržavati se odredaba Pravilnika o održavanju web stranica pravosudnih institucija u okviru pravosudnog portala.

Član 2.

Sadržaj web stranice

Sadržaji web stranice sačinjeni su od informacija koje mogu biti u formi teksta, slike, tabele, liste ili video zapisa.

Član 3.

Članovi web uredništva

Članovi web uredništva su odgovorni za izgled i sadržaj web stranice Tužilaštva. Web uredništvo uključuje sljedeće osobe:

- glavni urednik
- urednici web sadržaja
- web administrator

U rad web uredništva mogu se uključivati i drugi zaposleni u Tužilaštvu, blagovremeno dostavljati relevantne činjenice urednicima web sadržaja.

Član 4.

Glavni urednik

Glavni urednik je Glavni tužilac Kantonalnog tužilaštva Kantona Sarajevo i obavezan je da organizuje nesmetan rad web uredništva u redovnim uvjetima rada Tužilaštva, te odobrava sadržaj za objavljivanje na web stranici.

Član 5.

Urednici web sadržaja

Urednici web sadržaja su portparol i službenik za informiranje. Odgovorni su za prikupljanje informacija koje se objavljuju na web stranici, a naročito prikupljanje, provjera, obrada i uređivanje informacija - pripreme za objavu, mogućnost objave odobrenog sadržaja od strane Glavnog urednika, kao i ažuriranje, briga o gramatičkoj i pravopisnoj ispravnosti sadržaja koji se objavljuju.

Član 6.

Web administrator

Web administrator je odgovoran za unos i arhiviranje sadržaja web stranice koje pripremi i odobri web uredništvo - arhiviranje i uklanjanje sadržaja web stranice u skladu sa odluka web uredništva - pružanje tehničke pomoći ostalim članovima web uredništva.

Web administrator prikuplja statistike i druge podatke vezane za korištenje web stranice i na osnovu tih podataka web uredništvu daje prijedloge o unaprjeđenju i poboljšanju vizualnog i sadržajnog izgleda web stranice.

Član 7.

Transparentnost i javnost

Objavljivanje informacija o tužilačkim odlukama na internet stranicama pravosudnih institucija je, pored ostalog, važan način osiguravanja javnosti i transparentnosti rada pravosuđa i pomaže da šira javnost bolje razumije krivični postupak i bude informirana o njegovom toku i ishodu, čime se jača i povjerenje javnosti u rad pravosuđa. Transparentnost i javnost krivičnog postupka u pravilu se primjenjuju od momenta potvrđivanja optužnice.

Član 8.

Zaštita interesa djeteta i maloljetnika

Dijete i maloljetnik je svaka osoba mlađa od 18 godina. Lični podaci o takvoj osobi se ne mogu objavljivati i moraju biti zaštićeni tokom cijelog postupka i bez obzira na status te osobe u konkretnom postupku.

Član 9.

Zaštita interesa svjedoka

Lični podaci svjedoka se ne objavljuju sve do završetka njegovog saslušanja pred sudom nakon podizanja optužnice, dok se lični podaci ugroženih i zaštićenih svjedoka ne objavljuju ni nakon donošenja presude, osim ako sud ne odluči drugačije.

Član 10.

Način objavljivanja odluka u fazi istrage

Naredba o provođenju istrage se, zbog prirode ove odluke, ne objavljuje na web stranicama, jer predstavlja interni akt Tužilaštva. Izuzetno, objavljuju se samo saopštenja za javnost i drugi informativni sadržaji, i to u slučajevima kad se utvrdi postojanje posebnog javnog interesa.

Kada se odluče objaviti podaci iz ove faze postupka, poštovat će se pravilo da tako objavljeni podaci ne otkriju identitet osumnjičenih lica, na način da se objave samo njihovi inicijali ili da informacija bude bez inicijala i ličnih podataka, a da obuhvata podatke o tome koje radnje su predmet istrage tužilaštva i o kojem je krivičnom djelu riječ. Izuzetno se mogu objaviti i lični podaci osumnjičenog ako su odranije poznati javnosti.

Član 11.

Naredba da se neće provoditi istraga i naredba o obustavi istrage

Naredba da se neće provoditi istraga i naredba o obustavi istrage se ne objavljuju na web stranicama, uz pravilo o objavljivanju saopštenja koje se analogijom primjenjuje kao kod naredbe o provođenju istrage i u slučajevima kad je objavljen podatak o vođenju te konkretne istrage, a sve u cilju davanja tačne i sveobuhvatne informacije o odnosnom djelu i počiniocu.

Član 12.

Prijedlog za određivanje pritvora i izricanje mjera zabrane

Prijedlog za određivanje pritvora i izricanje mjera zabrane se u pravilu objavljuje u vidu saopštenja, u anonimiziranoj formi, na način da je iz saopštenja vidljivo da li je prijedlog podnesen i kojem sudu, inicijali osumnjičenog/ih, krivično djelo koje se osumnjičenom stavlja na teret, te posebni razlozi za pritvor. Izuzetno se mogu objaviti lični podaci osumnjičenog, ako su odranije poznati javnosti.

Član 13.

Podignuta optužnica

Informacija o podignutoj optužnici, prije potvrđivanja optužnice, može se objaviti, i u tom slučaju treba da sadrži informacije prema kriterijima koji se odnose na prijedlog za određivanje pritvora.

Član 14.

Potvrđena optužnica

Sve se potvrđene optužnice mogu objaviti bez ograničenja vezanih za prirodu i težinu krivičnog djela, a u skladu sa kapacitetima i resursima pojedinih tužilaštava. Preporučuje se da se osigura minimum transparentnosti i učine dostupnim na web stranicama optužnice ili odgovarajući informativni sadržaji za:

1. predmete ratnih zločina i drugih krivičnih djela protiv međunarodnog prava koja ne zastarijevaju,
2. organizirani kriminal,

3. koruptivna krivična djela,
4. krivična djela protiv službene dužnosti,
5. privredni kriminal,
6. krivična djela za koja se može izreći kazna dugotrajnog zatvora ili zatvora u trajanju od 10 godina, i u drugim predmetima gdje se utvrdi "poseban javni interes".

Član 15.

Optužnice ili informativni sadržaji koji se objavljuju treba da sadrže informacije:

1. Tužilaštvu koje je podiglo optužnicu;
2. "lične podatke" o optuženoj osobi i to: puno ime i prezime, godina i mjesto rođenja. U slučaju pravne osobe, objavljuju se puni podaci o pravnoj osobi kako su navedeni u optužnici,
3. činjenični i pravni opis krivičnog djela, bez imena oštećenog/ih i svjedoka i drugih podataka koji mogu otkriti identitet svjedoka ili oštećenih,
4. prijedlog za produženje (određivanje) pritvora,
5. prijedlog za određivanje mjera osiguranja oduzimanja imovinske koristi,

Neće se objaviti dio optužnice koji sadrži imena svjedoka i oštećenih, prijedlog dokaza, rezultate istrage i dokaze koji potkrepljuju navode iz istrage.

Član 16.

Presumpcija nevinosti

Uz sve informacije i odluke koje se objavljuju do pravomoćnosti presude, potrebno je objaviti i napomenu o načelu presumpcije nevinosti, u sljedećem obliku:

“Potvrđivanje optužnice protiv određene osobe ne znači da je ta osoba zaista i odgovorna za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica.”

Član 17.

Prvostepene i pravomoćne presude

Presude su javne i u načelu se objavljuju bez ograničenja vezanih za prirodu i težinu krivičnog djela; u pravilu se osigurava objavljivanje presuda za ona krivična djela za koja se objavljuju optužnice.

Član 18.

Urednici web sadržaja i web administrator za svoj rad odgovaraju Glavnom uredniku, odnosno, Glavnom tužiocu.

Član 19.

Ovaj Pravilnik stupa na snagu danom donošenja.

GLAVNA KANTONALNA TUŽITELJICA

Sabina Sarajlija

